

Di 19 edicion di Hebbe Hebbe dedica na Lynchie Merryweather



ORANJESTAD(AAN): E aña aki e di 19 edicion di Hebbe Hebbe ta bay ta riba 16 di Februari, manera semper riba e parkinglot di Postkantoor.

Durante un conferencia di prensa Manuel da Silva a indica cu ta bay tin diferente cambio, incluyendo un cushina nobo esta di Jason Fun, di Fun Catering.

“Tur e cambionan ta cambionan pa bon, pasobra tur hende kier ta parti di Hebbe Hebbe”, segun da Silva.

Manera custumber Melvin Garcia ta bay ta e maestro di ceremonia, mientras cu Beatz Entertainment ta bay ta e DJ.

Pa loke ta e bandanan cu ta bay participa, semper ta warda

te despues di e Caiso & Soca Monarch Contest pa anuncia cua ta e bandanan cu ta bay ta riba e escenario, mirando cu ta pueblo tin cu dicidi.

Shohaira da Silva durante un conferencia di prensa a anuncia cu e aña aki Hebbe Hebbe

ta wordo dedica na un persona cu for di baby caba tabata stima Carnaval y 20 aña pasa el a dicidi di cuminsa cu su propio grupo.

Ta trata di e grupo Champagne, pues Hebbe Hebbe ta bay wordo dedica na Lynchie Merryweather.

Señora Merryweather, kende 5 minuut prome cu e conferencia di prensa ainda no tabata sa cu e actividad ta bay ta dedica na dje, a gradici tur hende cu a yuda atravez di tur e añanan.

El a bisa tambe cu e ta sinti su mes honra pa wordo escogi.

Un siman prome cu Hebbe Hebbe lo anuncia cua ta e bandanan cu ta bay participa na e evento.

